

VOZES de COMPOSTELA

Folleto Mensual
de Información

Nº2, Maio-1996

Editado polo

Colectivo Gai de Compostela

Comeza o cobro das cotas aos domiciliados do CGC

Se todo vai ben, en principio, este mes de Maio pasa-se o recibo correspondente ao primeiro trimestre do ano (Xaneiro, Febreiro e Marzo) aos membros do CGC que teñen domiciliada a sua cota no banco. Este retraso do primeiro cobro debe-se a problemas técnicos co soporte informático que Caixavigo puxera a disposición do CGC para facilitar a xestión destes cobros. O recibo correspondente ao trimestre actual ha-se pasar xa no vindeiro mes de Xuño. Os encargados da xestión destes cobros peden desculpas a todos os domiciliados. A sua intención non é a de vos arruinar a tod@s!!!

A Comisión Antí-agresións ainda espera pola resposta de Estévez e de Villanueva

Xa hai máis de meio mes que se lles foron enviadas as cartas ao alcalde de Compostela e ao reitor da USC e ainda non se recibiu resposta nengunha. Nestas cartas pedia-se-lles unha entrevista para falar das agresións homófobas que se seguen a producir na alameda e no campus compostelán. O CGC pensa esperar meio mes máis antes de aplicar accións directas ao respecto.

Campaña de Servizos Sociais: chegan as primeiras respostas

Ao pouco de enviar cartas á sección de Servizos Sociais de máis de 90 concellos de toda Galiza, o CGC recibiu xa a resposta do responsable na matrícula do concello de Allariz. Na súa carta, o responsable dos Servizos Sociais deste municipio compromete-se a atender convenientemente aos homosexuais que recorran á súa sección e pede, ademais, información sobre o CGC para que lles sexa accesible, non só aos gais do concello, senón a toda axente nova através da Oficina de Información Xuvenil.

O CGC vai estar presente na manifestación convocada pola ANOC (*Asociación Nacional da Obxeción de Conciencia*) e pola AFAOI (*Asociación de Familiares e Amigos de Obxectores e Insubmisos*) para o 25 de Maio en Compostela. Coa sua presenza na manifestación, o CGC quer insistir no direito que temos os gais a nos declarar insubmisos en razón á nosa condición de disidentes sexuais. A denuncia das estruturas militares como institucións machistas e homófobas, radicalmente opostas aos nosos posicionamentos, está na base desta reivindicación do direito á insubmisión por sermos gais. A resposta do CGC a esta convocatoria insire-se, ademais, na campaña de marinsubmisión que ainda está por deliñar. Para máis información sobre o tema non dubideis en achegar-vos ao local ou en escrever ao apartado 191.

S'homos na Europride'96

Este ano é Copenhague a cidade onde se han celebrar os actos da Europride. E coincidindo co centenario das primeiras revistas gais polo que se vai organizar na capital dinamarquesa unha exposición de todas as publicacións gais europeas. O noso colectivo enviou aos organizadores exemplares de todos os números do S'homos para que sexan expostos na mostra. Ainda que nós non poidamos ir deixa Copenhague, as nosas revistas si han estar aló para seren tocadas e sobadas ao máximo. Por certo, xa se está a preparar o novo número do S'homos para o 28 de Xuño: se tedes propostas, artigos, debuxos, etc. achagade-as canto antes á Comisión do Voceiro.

Porto Editora: comezan a chegar as primeiras contestacións

Hai unhas semanas, a ILGA-Portugal e o Grupo de Traballo Homossexual lanzaron un chamamento de apoio internacional á súa campaña contra a Porto Editora. As definicións de homosexualidade e lesbia-

nismo que aparecen no diccionario desta editorial son vergonhosas: no primeiro caso fala-se de "*inversao sexual*" e no segundo de "*aberracao sexual*". As organizaciones gais portuguesas propuxeron un modelo de carta-protesta para ser enviado á dirección desta editorial. Debido ao alto grao de utilización do dicionário da Porto Editora na Galiza e á proximidade cultural e xeográfica que nos une con Portugal, o CGC decidiu apoiar esta campaña facendo cópias da carta-protesta e repartindo-a para ser enviada. As primeiras cartas de resposta da editorial xa van chegando. Nelas a Porto Editora compromete-se a considerar a nova redacción das entradas '*homossexualidade*' e '*lesbianismo*' na próxima edición do seu dicionário. Así e todo, cantas más cartas se envien más posibilidades hai de que se fagan desaparecer as definicións actuais: non deixes de mandar a tua carta-protesta!!!

Chile: nova campaña de apoio internacional

O CGC decidiu responder ao chamamento de apoio á campaña de protesta que se está a realizar en Chile polas últimas detencións efectuadas a homosexuais neste país americano. Chile ainda tipifica a homosexualidade como delito na sua lexislación: os últimos homosexuais arrestados en locais de ambiente da capital chilena foron submetidos a vexacións ante cámaras de televisión. Ante isto, as organizaciones internacionais proponen un modelo de carta-protesta para ser enviada á embaixada chilena. O CGC ha distribuir cópias desta carta para ampliar o campo de acción desta campaña na Galiza: non deixes de enviar a tua.

Mesas informativas nas facultades

Como xa ten feito outras veces, o CGC pensa ir instalando mesas informativas en diversas facultades da universidade compostelá. No mes de Maio foi a vez da Facultade de Filoloxía. O obxectivo destas mesas é o de facer coñecer as accións e os servizos do CGC á poboación universitaria da cidade. A acollida en Filoloxía foi positiva e, ademais do reparto de numerosos folletos, a venda de pins e revistas superou as expectativas iniciais. Para a semana da Liberación Gai (28 de Xuño) ten-se pensado pór tamén outra mesa informativa na rua. O ano anterior a experiencia fora tamén moi positiva: foi moita a xente que se parou a mirar as revistas e mais os folletos do colectivo. Hogano esperamos manter as expectativas.

Perfila-se o programa de actos para o 28 de Xuño

A comisión organizadora do 28 de Xuño ofereceu xa a sua primeira proposta de actividades para celebrar o dia da Liberación Gai. Durante toda a semana do 28 pensa-se facer outro video-fórum gai con películas como *Trilogía en Nueva York* ou *Priest*. A festa e mais a concentración / manifestación son actos que se celebrarán case con total seguridade. As datas e o lugar de celebración dos diferentes actos ainda está por concretar, pero han ser anunciados mediante programas e carteis alomenos cunha semana de antelación. Se tedes novas propostas ou queredes máis información ao respecto xa sabedes: escribebede-lle á comisión ou, mellor ainda, pasade polo local nas horas de costume.

Acción internacional

A Comisión Internacional de Direitos Humanos para Gais e Lesbianas envia periodicamente un boletín informativo sobre casos de violación das liberdades dos homosexuais en todo o planeta. Por outra banda, a través da Internet, reciben-se chamadas de apoio internacional a campañas levadas por colectivos gais fóra das nosas fronteiras. Se queres información máis detallada sobre estas campañas e sobre estes puntos de contacto escribe-lle á Comisión de Relacións Exteriores do CGC ou pasa polo local en horas de costume. Temos recibido chamadas de apoio ante as políticas e as agresións homófobas que se están a dar en Perú, Zimbawe, Arxentina e no Salvador. Tamén se dan chamamentos para que se presione en Polonia, Brasil e Uruguai afin de acadar reformas legais que melloren a calidade de vida da poboación homosexual. En Romania e en Rússia estas reformas foron rexeitadas, tamén se pede o apoio internacional. Se queres participar activamente nestas campañas de acción internacional, escribe-nos ou visita-nos para que che pasemos os enderezos aos que has de te dirixir.

**E preparai-vos, que vén
Xuño e tedes que vos rut
guap@s para tanto sarao!!**

Xa sabes...

**Escrebe-nos ao Apdo. 191
CP 15780-Compostela ou vén ver-
nos na Rua Entremuros 16 de
luns a venres a partir das 20:30h.**